

# 佛說施燈功德經

高齊北天竺三藏法師那連提黎耶舍 譯



南無本師釋迦牟尼佛

## 說明

本繁體校正版《佛說施燈功德經》電子書，根據《乾隆大藏經》大乘單譯經，第 0424 部，高齊北天竺三藏法師那連提黎耶舍譯《佛說施燈功德經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年二月



掃碼關注仁慧草堂微信公眾號

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三編)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

### 普供養真言

(三編)

唵. 誝誝曩. 三婆嚩. 禡日囉斛.

南無本師釋迦牟尼佛（合掌三稱）

## 開經偈

（一編）

無上甚深微妙法 百千萬劫難遭遇  
我今見聞得受持 願解如來真實義

# 佛說施燈功德經

高齊北天竺三藏法師那連提黎耶舍譯<sup>1</sup>

如是我聞：

一時，佛在舍衛國·祇樹·給孤獨園。

爾時，世尊告舍利弗言：「舍利弗，佛有四種勝妙善法，能令眾生得無量果、無量光明、無量妙色、無量福藏、無量樂藏，無量戒、定、智慧、解脫、解脫知見、辯才之藏，一切無著無漏之法。

「舍利弗，何等為四？一者，謂如來、應、正遍知得尸波羅蜜，具無量戒；二者，得禪波羅蜜，具無量定；三者，得般若<sup>2</sup>波羅蜜，具無量慧及廣智慧、觀達慧、如性慧、無數慧、決定慧、畢定知見；四者，得無濁心、善勝作心，具妙解脫、第一解脫。是為四種勝妙善法。

「舍利弗，是佛、如來、應、正遍知於一切惡皆悉遠離，一切善法皆悉成就，眾行備滿，具如實見，遠離闇冥，能為光曜，具足無量福智資

<sup>1</sup> 大正藏：高齊天竺三藏那連提黎耶舍譯

<sup>2</sup> 大正藏：波；永樂北藏及龍藏：般

糧，隱蔽世間，不為世間之所映奪，獲得戒、定、智慧、解脫、解脫知見，具足十力、四無所畏，得一切諸佛法力，能具諸佛法力，得具諸佛大慈悲力及辯才力，本願方便，皆悉滿足，善修本業，具智慧寶，精進無量，終不休息，離諸憂感，無有逼惱，無有取著，能善調伏，為大龍王，無有餘習，為一切眾生無上福田。

「舍利弗，若比丘、比丘尼、沙彌、沙彌尼、優婆塞、優婆夷，清淨心<sup>3</sup>，為求福故，為愛樂福故，思念如來，無上方便本行滿足，盡未來際一切生死，於現在世成就無量無著戒、定、智慧、解脫、解脫知見，乃至念佛一種功德。念功德已，於無量億那由他百千劫中，所習善根三明福田所、清淨戒所、無等等戒所、無量真實大功德<sup>4</sup>所，或於塔廟諸形像前，而設供養，為供養故<sup>5</sup>，奉施燈明，乃至以少燈炷，或酥<sup>6</sup>油塗然，持以奉施，其明唯照道之一階。

「舍利弗，如此福德非是一切聲聞、緣覺所能了知，唯佛、如來乃能知也！舍利弗，求世報者，福德尚爾，何況以清淨深樂心，不求果報，

<sup>3</sup> 大正藏：發清淨心；永樂北藏及龍藏：清淨心

<sup>4</sup> 大正藏：功德；永樂北藏及龍藏：大功德

<sup>5</sup> 大正藏：而設供養故；永樂北藏及龍藏：而設供養，為供養故

<sup>6</sup> 大正藏：蘇；永樂北藏及龍藏：酥

安住恭敬，相續無間念佛功德？善男子、善女人等所生福德，舍利弗，照道一階福德尚爾，何況全照諸<sup>7</sup>階道也，或二階道，或三<sup>8</sup>階道，或四階道；或及塔身一級、二級乃至多級；一面、二面乃至四面及佛形像？

「舍利弗，彼所燃燈，或時速滅，或風吹滅，或油盡滅，或炷盡滅，或俱盡滅。譬如諸龍以瞋恚故，出雲垂布，於中起電，起已尋滅。

「舍利弗，如是少時於佛塔廟奉施燈時<sup>9</sup>，若彼比丘、比丘尼、沙彌、沙彌尼、優婆塞、優婆夷，若復餘人不受戒者，為樂善故，護己身故，信佛、法、僧，如是少燈奉施福田，所得果報福德之聚，唯佛能知。一切世間人、天<sup>10</sup>、魔、梵、沙門、婆羅門，乃至聲聞、辟支佛等所不能知。如是然少燈明，所受福報不可得說。

「舍利弗，諸佛境界不可思議，唯有如來乃知此義。舍利弗，彼施燈者，所得福聚無量無邊，不可算數，唯有如來乃能了知。舍利弗，然少燈明福德尚爾，不可算數，況我滅後，於佛塔寺，若自作，若教他作，或然一燈、二燈乃至多燈，

<sup>7</sup> 大正藏：一；永樂北藏及龍藏：諸

<sup>8</sup> 大正藏：二；永樂北藏及龍藏：三

<sup>9</sup> 大正藏：明；永樂北藏及龍藏：時

<sup>10</sup> 大正藏：天、人；永樂北藏及龍藏：人、天

香華、瓔珞<sup>11</sup>、寶幢、幡蓋及餘種種勝妙供養？

「舍利弗，有四種法應當信受。何等為四？一者，佛法無量，應當信受；二者，少修善根，獲無量報，應當信受；三者，若於三寶深生敬信，善修業行，所得福報，汝等聲聞現得見我，尚不能得具足知之，亦復不能思惟測度，況我滅後，聲聞弟子遠離我者，能得見<sup>12</sup>知及能測度？若有能知及測度者，無有是處，應當信受；四者，是諸聲聞不能得知及能測量一切眾生所有作業及業果報。舍利弗，汝等聲聞於此事中不須思量。何以故？舍利弗，如來常說一切眾生業行果報不可思量；過去諸佛、應、正遍知已如是說眾生業報不可思量；未來諸佛、應、正遍知當如是說眾生業報不可思量。眾生心信及心自性亦不可知、不可思量，如是之義應當信受！

「舍利弗，汝等聲聞住聖種者，於一切眾生業報之中，無有實眼及巧方便，況餘輕微薄劣心者、離戒、定、慧、解脫、解脫知見者、失正念者、無明闇冥厚翳目者？於自己身內、外諸法而不能知——我竟是誰？我是誰許？我住何處？

<sup>11</sup> 大正藏：鬘；永樂北藏及龍藏：珞

<sup>12</sup> 大正藏：現；永樂北藏及龍藏：見

我之功德為大、為小？我當云何為與戒相應、為與戒不相應？我為正念戒、我為失念戒？我所作業為作智人業、為作愚人業？為從何來、為何處去？舍利弗，諸凡夫人顛倒見者，於自己身如是等事尚自不知，況能得知一切眾生種種業報？若能知者，無有是處。

「舍利弗，如來、應、正遍知，戒無減，定無減，智無減，解脫無減，解脫知見無減，相無減。舍利弗，如來、應、正遍知，無量戒、無礙戒、不思議戒、無等戒、究竟戒、清淨戒，彼如來於一切眾生若業、若業報，皆如實知。

「舍利弗，云何如來於一切眾生業報得如實知？舍利弗，佛如實<sup>13</sup>知：或有眾生善業盡，不善業增；或有眾生不善業盡，善業增；或有眾生善業當生，不善業當滅；或有眾生不善業<sup>14</sup>當生，善業當滅。舍利弗，如來如是入一切眾生業及業報，種種差別皆如實知。彼彼眾生或有無知或有愚闇，或有善者或不善者。舍利弗，我有如是智，如是<sup>15</sup>善巧，於諸眾生不可思議種種業報，皆能記說。

<sup>13</sup> 大正藏：是；永樂北藏及龍藏：實

<sup>14</sup> 大正藏：善；永樂北藏及龍藏：善業

<sup>15</sup> 大正藏：有如是；永樂北藏及龍藏：如是

「舍利弗，若有眾生成就信心，彼能信我。若復眾生無有信心，遠離我法，不信我語，誹謗於我，彼於長夜無義、無利，墜墮苦惱。舍利弗，若彼眾生於佛塔廟奉施燈明，以此奉施所作善業，能獲安樂、可樂之果。彼施燈明作善業時，欣喜相應。從信心起，於現在世得三種淨心。何等為三？彼諸善男子、善女人作是念：『我於如來已設供養，知身不堅，攝堅身想；知財過患，攝堅財想。』舍利弗，是名供養佛塔第一淨心。復次，舍利弗，彼諸善男子、善女人起如是心：『我於如來無上福田、最勝福田，能受最勝供養者所，已作供養。我今不畏墮於地獄、畜生、餓鬼。我此善根，已作人、天善道之因，得於妙色資生眾具，又得智慧、安隱、快樂，乃至能得菩提之果。』舍利弗，是名供養佛塔第二淨心。復次，舍利弗，彼諸善男子、善女人作如是想：『我於諸佛已作捨施，已作福德，已捨慳貪，已除慳過。』作如是<sup>16</sup>念已，施心無慳，施心增長。舍利弗，是名供養佛塔第三淨心。

「復次，舍利弗，若善男子、善女人於佛塔廟施燈明已，臨命終時得三種明。何等為三？一

<sup>16</sup> 大正藏：是；永樂北藏及龍藏：如是

者，彼善男子、善女人臨命終時，先所作福悉皆現前，憶念善法而不忘失。舍利弗，是為一明；因此便能念知，自己先於佛所植<sup>17</sup>諸善業。復次，舍利弗，彼善男子、善女人於命終時，得如是念：『我於佛像塔廟等前，已曾供養。』作是念已，心生踊悅。舍利弗，是為二明；因此便能起念佛覺。復次，舍利弗，彼善男子、善女人於命終時，見餘眾生奉行布施，見他作已，起如是念：『我亦曾於佛支提所奉施燈明，我今亦當復行布施！』念於布施，得欣喜心；得喜心已，無有死苦。舍利弗，是為三明；因此便得念法之心。

「復次，舍利弗，佛塔廟中布施燈者<sup>18</sup>，彼善男子、善女人於臨終時，更復得見四種光明。何等為四？一者，於臨終時，見於日輪圓滿涌出；二者，見淨月輪圓滿涌出；三者，見諸天眾一處而坐；四者，見於如來、應、正遍知坐菩提樹，垂得菩提，自見己身，尊重如來，合十指掌，恭敬而住。舍利弗，是名於佛塔廟布施燈已，臨命終時，得見如是四種光明。」

爾時世尊說此義已，復說偈言：

<sup>17</sup> 大正藏：殖；永樂北藏及龍藏：植

<sup>18</sup> 大正藏：明；永樂北藏及龍藏：者

|         |         |
|---------|---------|
| 無上法王大仙人 | 若人奉施彼塔廟 |
| 彼智慧者作業已 | 獲得無邊最勝樂 |
| 臨命終時不失念 | 能見自昔布施燈 |
| 得四種喜離諸罪 | 於彼死時不惑亂 |
| 臨死時見十方明 | 現覩日月從地出 |
| 見天千萬那由他 | 為彼天眾說佛法 |
| 父母妻子及親屬 | 皆悉圍繞大悲號 |
| 死者不念亦不視 | 彼人正念常不亂 |
| 現前得覩天宮殿 | 對諸天女心安隱 |
| 復見莊嚴諸園林 | 是中具足勝五欲 |
| 又見佛坐菩提樹 | 天人修羅悉圍繞 |
| 自見合掌住佛前 | 於勝牟尼修供養 |
| 既見導師深敬重 | 其心欣喜請如來 |
| 世尊見彼心欣喜 | 於是不違受彼請 |
| 是人稱願喜充遍 | 於捨命時無苦惱 |
| 彼於佛所心喜已 | 無有臨終大怖畏 |
| 臨命終時不失念 | 彼覩十方皆大明 |
| 見未曾有勝妙色 | 此是施燈之果報 |
| 死已必得生天上 | 自見己身坐天床 |
| 有諸天女圍繞之 | 供養佛故得此果 |

「復次，舍利弗，於佛塔廟施燈明已，死便生於三十三天。生彼天已，於五種事而得清淨。

舍利弗，云何彼天於五種事而得清淨？一者，得清淨身；二者，於諸天中得殊勝威德；三者，常得清淨念慧；四者，常得聞於稱意之聲；五者，所得眷屬常稱彼意，心得欣喜。舍利弗，是名彼天於五種事而得清淨。」

爾時，世尊欲重宣此義，而說偈言：

|         |         |
|---------|---------|
| 彼天獲得光明身 | 具足功德他尊重 |
| 與千天子為上首 | 以燈施佛支提故 |
| 所聞天聲常稱意 | 哀美殊妙勝餘天 |
| 具足第一勝念慧 | 復得最上勝眷屬 |
| 隨彼天子所行處 | 一切諸天皆欽仰 |
| 本昔修習何等業 | 今得如是熾然身 |
| 有樹皆名上歡喜 | 周匝光照猶如月 |
| 彼天感得是妙樹 | 持此莊飾天宮園 |
| 無量諸天皆驚怪 | 今此樹華名何等 |
| 猶如燈明光照曜 | 普出如意妙熏香 |
| 彼天所有諸眷屬 | 以彼樹華莊嚴身 |
| 彼於無量億天中 | 光明照曜猶如日 |

「復次，舍利弗，於佛塔廟布施燈明，生三十三天已，彼天自知：『如是時中，我住於此；如是時中，我當命終。』彼勝天子臨命終時，於其眷屬及餘天眾，說法勸化，令其欣喜。於彼天

宮捨壽命已，不墮惡趣，生於人中最上種姓、信佛法家。是時，世間若無佛者，亦復不在輒<sup>19</sup>取吉凶、邪見家生。」

爾時，世尊欲重宣此義，而說偈言：

|         |         |
|---------|---------|
| 彼天生得如是智 | 知爾許時天中住 |
| 彼天亦復能自知 | 我今未幾當命盡 |
| 五種死相出現時 | 彼天壽命臨欲絕 |
| 即為億天眾說法 | 遠離愚癡心不憂 |
| 於天眾中作是言 | 諸有無常亦無樂 |
| 或有生者或有死 | 不念將死說是法 |
| 彼諸眷屬皆悲惱 | 無量天眾亦復然 |
| 雖復見已五種相 | 自念功德不憂愁 |
| 在彼天宮命絕已 | 尋即下來人間生 |
| 住胎出胎念不亂 | 常受快樂無苦惱 |
| 生已便得宿命通 | 悉能憶念本來處 |
| 念人中苦不貪樂 | 須臾死來見逼切 |
| 彼念天中果報已 | 於此人間不為樂 |
| 天中尚苦況復人 | 諸有不堅常流動 |
| 彼人及其成立已 | 必當捨家而出家 |
| 心常不行惡覺觀 | 彼當獲得如是果 |
| 世世恒得宿命通 | 亦常不作諸惡業 |

<sup>19</sup> 大正藏：輒；永樂北藏及龍藏：輒

必定出家持淨戒 此是彼施燈明果  
恒常不盲及癩<sup>20</sup> 瞽 眼一切時不闇昧  
身亦無病無惡聲 心常黠慧不愚惑  
又復恒常無眼患 所在受生眼不眇  
不無一眼及瞎眼 彼眼亦常不濁亂  
眼目修長黑白分 猶如淨妙青蓮葉  
眼淨能見微細物 如彼明徹摩尼珠  
無量阿僧祇劫中 得淨肉眼不失壞  
彼亦常無眼諸病 此是奉施燈明果  
善印善相<sup>21</sup> 善諸論 於諸工巧悉究了  
彼有智人善觀察 妙慧能見第一義  
善觀諸有不自在 於佛法中得照明  
普見一切佛世尊 見已恭敬修供養  
生生得勝端正色 親戚眷屬皆敬愛  
得大財寶力自在 及得不壞諸眷屬  
如彼燈明能破闇 熾燃照曜遍諸方  
彼人光明亦如是 不為闇冥所隱蔽  
若於佛塔起信心 施勝燈鬘及瓔珞  
施燈明時心清淨 獲得人中最勝尊  
端正殊妙甚可愛 一切世間所喜樂

<sup>20</sup> 大正藏：孿；永樂北藏及龍藏：癩

<sup>21</sup> 大正藏：根；永樂北藏及龍藏：相

心不輒<sup>22</sup>取於吉凶 亦不樂於世左道  
世間所有諸惡見 及邪道等不信受  
若為國王恒知足 不貪他土興戰諍  
常無苦惱亦無愛<sup>23</sup> 亦復無有諸惱熱  
彼無一切諸退失 復無惡名無衰惱  
若為王臣所發言 王及國人無不信  
身常無有羸瘠病 不作黃門不非道  
身相具足安樂住 患苦不能著其身  
亦復不見諸惡夢 臥覺一切常安隱  
生生能得諸伏藏 供養一切佛支提  
諸佛功德無有邊 彼人所得亦如是

「舍利弗，若有眾生於佛塔廟施燈明者，得於四種可樂之法。何等為四？一者，色身；二者，資財；三者，大善；四者，智慧。舍利弗，若有眾生於佛支提施燈明者，得如是等可樂之法。」

爾時，如來欲重宣此義，復說偈言：

身臚圓滿具大力 不與他人共戰諍  
遍遊諸方無惱者 由燈奉施佛支提  
生於大富上族家 具足功德人所敬  
生生恒得宿命智 由燈奉施佛支提

<sup>22</sup> 大正藏：輒；永樂北藏及龍藏：輒

<sup>23</sup> 大正藏：愛；永樂北藏及龍藏：愛

於諸眾生常悲念 發言眷屬皆敬受  
心無損害恒調柔 常不造作惡道業

「復次，舍利弗，若有眾生供養佛塔，得四種清淨。何等為四？一者，身業清淨；二者，口業清淨；三者，意業清淨；四者，善友清淨。

「舍利弗，云何得於身業清淨？若善男子、善女人於彼彼生處，遠離殺生，無殺害意，亦常遠離偷盜、邪淫，於己妻所尚不邪行，況餘人妻？亦不飲酒，放逸自縱，不以刀杖及餘苦具加逼眾生，離不善法及諸惡業。舍利弗，遠離是等，是名身業清淨。

「舍利弗，云何口業清淨？是人世世常不妄語，若不見聞終不妄說，若見若聞，合時諮問，然後乃語，為利自他，不作異說。設若有人教令妄語，為護實語，終不妄言，不以此語向彼人說，不持彼事向此人道。二朋先壞，不令增長，有所發言，能善和諍。若痛心語，若麤語，若苦惡語、不喜語、不樂語、不愛語、不入心語、惱他語、結怨語，悉皆遠離。有所發言，潤語、濡<sup>24</sup>語、意樂語、不麤語、悅耳語、美妙語、入心語、多人愛語、多人樂語、可愛語、可樂語、能除怨語，

<sup>24</sup> 大正藏：軟；永樂北藏及龍藏：濡

恒作如是種種美妙語。復離綺語，不作異想異語，不作異印異期，覆障實事，不煩廣語<sup>25</sup>，不非時語，恒究竟語。舍利弗，如是遠離不清淨口業，成就清淨口業。舍利弗，是名口業清淨。

「舍利弗，云何意業清淨？於他所有珍寶資財，不起貪著，不起瞋心，遠離害心，又離邪見，無諸惡見。舍利弗，遠離是等，是名意業清淨。

「舍利弗，云何得善友清淨？若諸善友，遠離妄語，亦不飲酒，離諸麤獷，調伏正見，往詣其所，親近諮受。又詣諸佛菩薩、緣覺、聲聞等所，親近供養，諮受未聞。舍利弗，是名第四善友清淨。

「舍利弗，若善男子、善女人於佛支提施燈明已，得如是等四種清淨。」

爾時，世尊欲重宣此義，而說偈言：

|         |         |
|---------|---------|
| 為欲照塔故然燈 | 身口意業善調伏 |
| 遠離邪見具淨戒 | 由是獲得如意眼 |
| 猶如淨日照十方 | 速能獲得於漏盡 |
| 彼大智慧具威德 | 得淨天眼離塵漏 |
| 智者能了眾生意 | 亦得通明及辯才 |
| 求二乘道得不難 | 由施佛燈獲是報 |

<sup>25</sup> 大正藏：說；永樂北藏及龍藏：語

若求無上佛菩提 天眼智慧及財物  
於此三事恒無減 由燈奉施佛支提

「舍利弗，若善男子、善女人住於大乘，於佛塔廟施燈明已，彼世世中得於八種可樂勝法。何等為八？一者，獲勝肉眼；二者，得於勝念，無能測量；三者，得於勝上達分天眼；四者，為於滿足修集道故，得不缺戒；五者，得智滿足，證於涅槃；六者，先所作善，得無難處；七者，所作善業，得值諸佛，能為一切眾生之眼；八者，若善男子、善女人以彼善根得轉輪王，所得輪寶不為他障，其身端正；或為帝釋，得大威力，具足千眼；或為梵王，善知梵事，得大禪定。舍利弗，以其迴向菩提善根，得是八種可樂勝法。

「復次，舍利弗，住於大乘善男子、善女人，復得八種無量勝法。一者，得於無量佛眼；二者，得於無量如來神通；三者，得於無量佛戒；四者，得於無量如來三昧；五者，得於無量如來智慧；六者，得於無量如來解脫；七者，得佛無量解脫知見；八者，得入一切眾生心所樂欲。舍利弗，善男子、善女人於佛塔廟奉施燈明，能攝如是無量勝報。

「復次，舍利弗，若有眾生見說法者，作如

是念：『云何令彼常得宣說、願<sup>26</sup>示佛法？以燈施彼。施油燈故，令說法者得施法燈。』作是念已，持燈奉施，以此布施燈明善根，得於八種無量資糧。何等為八？一者，得於無量正念資糧；二者，得於無量大智資糧；三者，得於無量信心資糧；四者，得於無量精進資糧；五者，得於無量大慧資糧；六者，得於無量三昧資糧；七者，得於無量辯才資糧；八者，得於無量福德資糧。舍利弗，是名施燈八種資糧，亦復得於四無礙辯，乃至次第得一切種智。

「復次，舍利弗，若有善男子、善女人於如來前見他施燈，信心清淨，合十指掌，起隨喜心，以此善根，得於八種增上之法。何等為八？一者，得增上色；二者，得增上眷屬；三者，得增上戒；四者，於人、天中得增上生；五者，得增上信；六者，得增上辯；七者，得增上聖道；八者，得阿耨多羅三藐三菩提。舍利弗，是名八種增上之法。舍利弗，何故能得此等八種增上勝法？舍利弗，佛有無量戒、定、智慧、解脫、解脫知見故，供養彼者，所得果報、所得利益亦復無量。」

爾時，世尊欲重宣此義，而說偈言：

<sup>26</sup> 大正藏：願；永樂北藏及龍藏：願

造作出離行 勤修於佛法  
棄捨死軍眾 如象碎葦<sup>27</sup>林

爾時，佛告慧命舍利弗：「有五種法最為難得：一者，得人身難；二者，於佛正法得信樂難；三者，樂於佛法，得出家難；四者，具淨戒難；五者，得漏盡難。舍利弗，一切眾生於是五法最為難得，汝等已得。」

爾時，世尊重宣<sup>28</sup>前義，勸舍利弗等而說偈言：

|         |         |
|---------|---------|
| 如來支提修布施 | 為利眾生求菩提 |
| 智者造作此勝因 | 生生常得最勝報 |
| 於天人中受勝生 | 為人天等修供養 |
| 譬如須彌安不動 | 光明普遍照十方 |
| 彼天眾見皆恭敬 | 亦復愛樂生信心 |
| 彼興供養亦讚美 | 一切皆喜數數見 |
| 奇哉是天福德相 | 猶梵天光照梵宮 |
| 此天曾作何等業 | 身光明炎得如是 |
| 見是誰不修習善 | 誰不修學聖種戒 |
| 誰見牟尼生厭心 | 誰聞妙法而放逸 |
| 彼昔在於人間時 | 常以燈施如來塔 |

<sup>27</sup> 大正藏：花；永樂北藏及龍藏：葦

<sup>28</sup> 大正藏：欲重宣；永樂北藏及龍藏：重宣

曾佛法中設供養 善得福利生天中  
願我恒得於人身 於佛法中生淨信  
常不放逸住佛道 寧棄身命不捨法  
獲得人身最為難 愚人云何不為福  
徒費資財不為法 死已便墮大嶮坑  
天見無垢威德已 心自悔責發願言  
願我常得人間生 精勤修習於梵行  
願我最後臨終時 於佛法中得淨信  
願得正念不忘失 得見無量諸如來  
為千億天所供養 與諸天女相娛樂  
諸天女眾皆敬愛 天女莊嚴戲園林  
諸方天香皆來熏 耳聞一切妙音聲  
是天隨所遊行處 恒得覩見上妙色  
所可見色皆可愛 彼常不覩諸惡色  
亦復常得勝妙觸 皆由持燈施支提  
從彼沒已生人道 正念處於父母胎  
生已憶彼天中事 智慧之力不退失  
彼人造作如是業 得於大力轉輪王  
其王形貌極端嚴 施燈獲得如是報  
由彼業故得命長 一向清淨安樂器  
其身無有諸患痛 然燈獲得如是果  
無有王難怨賊難 他人不敢侵其妻

不為惡人之所惱 由持燈明施佛故  
安隱豐足無所畏 豪富自在饒財寶  
得勝瓔珞及園林 斯由然燈奉施佛  
當得覩見佛世尊 見已心便生敬信  
以欣喜心供養佛 棄捨王位而出家  
佛無量智究竟智 具可歎德能化人  
於此佛塔施燈已 其人身光如燈照  
牟尼牛王清淨眼 以好燈明照彼塔  
得於無漏無上道 其身光明照十方  
見四真諦具十力 不共之法亦究竟  
得遍見眼成善逝 此果皆由布施燈  
設令一切諸眾生 昔曾供養無量佛  
具大威德見實義 億劫來成緣覺道  
十方所有諸世界 悉布燈鬘無有餘  
以是世界諸燈鬘 若人信心供養彼  
是人如是修供養 於無量劫常不斷  
若人一燈奉施佛 得福過前無有量  
燈油譬如大海水 其炷猶如須彌山  
有人能然如是燈 遍照一切諸世界  
是人深心懷敬信 其志唯<sup>29</sup>求緣覺道  
十方遍置如是燈 一心恭敬而供養

<sup>29</sup> 大正藏：惟；永樂北藏及龍藏：唯

若人發於菩提心 手執草炬暫奉佛  
是人得福過於彼 我見實義作是說  
十方一切諸眾生 一一供具皆如上  
然經無量恒沙劫 其心唯求緣覺道  
若有人於佛塔廟 然於一燈或一禮  
求無上道為眾生 此福過前無有量  
難見難思佛境界 智者聞即生欣喜  
無信心者聞不樂 彼愚癡魔壞正法  
證淨法界甚為難 一切世間獨善逝  
是故汝等應欣喜 於佛功德當願求

爾時，世尊說此法已，慧命舍利弗等，無量天、人、阿修羅、乾闥婆、緊那羅、摩睺羅伽，人、非人等，聞佛所說，皆發無上菩提之心，欣喜無量，作禮而去。

佛說施燈功德經

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 補闕圓滿真言

(三編)

唵. 呼嚧呼嚧. 社曳穆契. 莎訶

### 普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉  
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無觀自在菩薩摩訶薩 (合掌三稱)

南無護法諸天菩薩 (合掌三稱)

## 禮佛發願文

(一編)

歸命十方調御師 演揚清淨微妙法  
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

## 迴向偈

(一編)

|       |       |
|-------|-------|
| 願以此功德 | 莊嚴佛淨土 |
| 上報四重恩 | 下濟三途苦 |
| 若有見聞者 | 悉發菩提心 |
| 盡此一報身 | 同生極樂國 |

## 三皈依

(一篇)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

